

արտայայտում եւ երկիրը կառավարում է իր իր ընտրած ներկայացուցիչները միջոցով:

Հեղինակի առաջին աշխատութիւնից — «Նոր Տետրակ, որ կոչի Յորդորակ» — մենք իմանում ենք, որ Հայաստան կոչուած այդ բաւական ընդարձակ երկիրն ունի 20 նահանգ, 258 գաւառ եւ 103 քաղաք, 27,864,000 բնակչով, որի ուղիղ կէսը՝ 13,932,000-ը Հայ, իսկ մնացած կէսը՝ այլազգի, «տաճիկ» ընդհանուր անունով:

Ինչպէս տեսնում էք, Հայաստանը բաւական իսկ ազդարնակութիւն ունի. մանաւանդ Հայերի թիւը շատ մեծ է: Հայաստանի գլխով անցած անվերջ փոթորիկները, թշնամիների դարաւոր տիրապետութիւնը, նրանց կոտորածները, նրանց անլուր հալածանքների ու բարբարոսութիւնների հետեւանքով տեղի ունեցած զանգուածային արտագաղթերը եւ այլ նման բազմաթիւ աղէտները — այդ ամէնը մեր հեղինակի համար կարծէք, ոչ մի արժէք չունին: Կարծէք նրանք ոչ մի դեր չեն խաղացել Հայ ժողովուրդի թուի նուազման դործում եւ կամ եթէ անգամ խաղացել են, սակայն նա՛ Շահամիրեանը — ինչպէս երեւում է — շատ մեծ է ընդունում Հայ ժողովուրդի սկզբնական թիւը — հաւանորէն այն առասպելական 35 միլիոնը — որը պահպանելով — պահպանելով Հանդերձ, այնուամենայնիւ դեռ եւս մօտ 14 միլիոն Հայ մնում է Հայաստանում:

ԱԶԳՈՒԹԻՒՆՆԵՐԻ ԻՐԱՒՈՒՆՔՆԵՐԸ  
ՀԱՅԱՍՏԱՆՈՒՄ

Մարդկային հաւասարութեան սկզբունքի այնքան ջերմ կուսակից Շահամիրեանը մի անգամից փոխում է, երբ հարցը վերաբերում է այդ սկզբունքի դործադրութեանը Հայաստանում:

Հայաստանում ապրող ժողովուրդները — նրա կարծիքով — հաւասար չեն: Նրանք բաժանուած են երկու կարգի — Հայ Լուսաւորչական բնիկներ եւ օտարազգիներ եւ օտար դաւանութիւնների պատկանողներ: Հայաստանը միմիայն Լուսաւորչական բնիկ Հայերին է եւ Հայաստանում ծնուած իւրաքանչիւր ոչ Հայ-Լուսաւորչական — ինչ ազգից եւ դաւանութիւնից էլ լինի — պատիւ պիտի համարի՝ իրեն հայ կոչել եւ անպայմանօրէն պէտք է խօսի

ու կարգայ հայերէն կամ ինչպէս ինքն է ասում՝ «Հայոց բառիւ եւ տառիւ» (Բ):

Ճիշդ նոյն տեսակէտն է սա, որ այսօր որդեգրել է «յեղափոխական» Քեմալտանը եւ այնքան մոլեգնօրէն կիրառում է կեանքում. բայց միայն այն տարբերութեամբ «որ Շահամիրեանը մի հպատակ եւ ստրուկ ժողովրդի գաւակ էր, ապրած ժԸ. դարում, իսկ այսօրուան Տաճկաստանի վարիչները մի անկախ «յաղթական» երկրի գաւակներ են եւ պճնուած 20-րդ դարի «ամենանորագոյն» դադափարնեւրով:

Ինչպէս տեսնում էք, Շահամիրեանի Հայաստանում բնիկ եւ Լուսաւորչական հայը մի արտօնեալ, դերագաս ազգութիւն է: Բոլոր քաղաքական եւ քաղաքացիական իրաւունքները նա վայելում է առանց որեւէ սահմանափակման: Բացառապէս բնիկ Հայ Լուսաւորչականը միայն կարող է ընտրել եւ ընտրուիլ բոլոր բարձր պետական պաշտօնների համար: Օրէնքը առ այդ յայտարարում է. «Ամենայն ծայրագոյն պաշտօն, յատկապէս տանուտէր, նախարար, դատաւոր, իշխան, սպարապետ, ասպետ, հանդերձ խորհրդակցօք, դպրօք, ատենաբանիւք եւ ամենայն դորագլխօք մի՛ ոք ստանայցէ, բայց ի սեփական ազգէն հայոց, սեփական ծնունդ Հայաստանեաց, մկրտեցեալ ի Քրիստոս, աւանդութեամբ սր. եկեղեցւոյ Հայաստանեաց» (ԼԳ., ՄԴ. ՄԵ.):

Բացի դրանից, միմիայն Լուսաւորչական բնիկ հայը կարող է անչարժ հարստութիւն ձեռք բերել, վաճառել եւ կտակել. «Ամենայն բնութիւն մարդոյ ի ազգէ եւ ի ժողովրդենէ հայոց, մկրտեցելոց եւ հաւատացելոց ի Քրիստոս, կարող է զնել երկիր վասն ժառանգութեան իւրոյ եւ վաճառել երկիր ումեք առն, ի նոյն ազգէ եւ դաւանութեամբ» (Ը):

Միւս բնիկ ազգութիւնները, ինչպէս նաեւ դրսից եկած օտարականները, մի տեսակ ստորագաս վիճակի մէջ են: Ուղիղ է, թէ եւ նրանք կարող են ազատ ապրել Հայաստանում, ազատ պաշտել իրենց կրօնը, ազատ երթեւեկել, ազատ իրենց դործերով զբաղուել, շարժական կայք եւ սեպհականութիւն ունենալ, վայելել օրէնքի ու պետութեան բովանդակ հովանաւորութիւնը. դեռ աւելի. նրանք ունին մի տեսակ ներքին ինքնավարութիւն անգամ դատական